



ILLUSTRISSIMO, SPECTATISSIMO VIRO,  
BENEFICENTISSIMO MÆCENATI  
D. D. L E N O I R;  
REGI A SANCTIORIBUS CONSILIIS,  
VIGILANTISSIMO SECURITATIS URBANÆ CUSTODI,  
PRO TOT TANTISQUE IN SE COLLATIS BENEFICIIS  
HOS QUALESUMQUE LABORUM SUORUM FRUCTUS  
OFFERT, DICAT ET VOVET

OBSEQUENTISSIMUS,  
*R. A. Saguer Despertieret.*





ILLUSTRISIMO, SPECIATISSIMO VIRO,  
BENEFICENTISSIMO MACEINATI

D. D. L. E. N. O. R.

REGI A SANCTIONIBUS CONSILIIS,  
VIGILANTISSIMO SECURITATIS URBANE CUSTODI,  
PRO TOT TANTISQUE IN SE COLATIS BENEFICIIS,  
HOS QUAE ESTIMANT LARGUM SE OREM SANCTUS  
OFFERT, DICAT ET VOVEL

OBSEQUENTISSIMUS,  
R. M. de la Roche-Beaucourt





DE

# LUE VENEREA IN RECENS NATIS.

## POSITIONES ANATOMICO-CHIRURGICÆ.

QUOTIDIANA, simul & luctuosâ nimis constat experienciâ plurimos à sanguine paterno in progeniem derivari morbos; sic imprægnatur vitiosâ labe intima illius constitutio, vitæque fit ingratum munus, & onus admodum grave ac molestum. Hereditariæ autem illæ affectiones non eâdem intensitate vigent, non eâdem adherent tenacitate.



Debellantur quædam solis naturæ viribus quas feliciter juvat idonea vitæ ratio, & promovet ætas firmior; sic ipsos inter œconomix animalis recessus perit iners strumofus, scorbuticus, arthriticus, seu rheumaticus humor. Non ita de viru venereo. Hic amarus impuræ libidinis fructus innocua mutui amoris pignora corrumpit radicitus, & majores edit strages, nisi salutari manu compescatur illius tumultus.

Accurate desunt observationes quibus natura luis venereæ victrix proclametur (1). Docet nos frequentior artis usus indomitum illud virus quandòque à propria indole fieri degener, & variâ obduci larvâ, undè dejiciuntur in errorem incauti vel inexpertes. Itaque experienciâ duce, naturam in morbo venereo à parentibus transmissa feliciter propugnandò minimè idoneam fateamur, & necessarium artis auxilium invocemus.

Sed, proh dolor! beneficam Chirurgi manum, ut ita dicam, vinciunt, mendax symptomatum indoles, infantulorum temperies imbecillior, & major remedii apti energia: sic in recens natis miasmate venereo afflatis, ad hodiernum usque diem, sæpius incassum tentata, imò exitiosa habita est curatio.

Medicinæ & Chirurgiæ Annales pervolventi hinc & indè occurrunt observationes quædam, & annotationes raræ, tum de Diagnosi innati istiusce morbi, tum de variis modis quibus existit mutuum & crudele lactantes inter & nutritos venereæ luis commercium, tum de diversa illius curandi methodo (2);

(1) Vide Fabre, *Traité des malad. vénér.* tom. 1, pag. 37.

(2) Vide Nicol. Massa, de morbo Neapolit. lib. 1. & 2. Lugd. 1536.

Les Œuvres de Paré, 1607.

La Chirurg. de Guillemeau, 1647.

Harris, de Luc Venereæ.



ineunte seculo, nondum promulgata fuerat doctrina ratione & experiëntiâ comparata. Inter remedia utilia, noxia, vel frustanea hærebat anceps Chirurgi manus.

Attamen lapsu temporis exspatiatur artis nostræ gyros de morbi venerei ætiologiâ, de symptomatibus quibus in recens natos monstrum illud debachatur, necnon de præstantiori modo hydrargiri apud eos administrandi (1).

Nonnulli existimârunt practici infantulos labe venereâ pollutos, unâ cum nutricibus methodo communi esse subjiciendos. Recta quidem illa opinio, sanum judicium; nulla autem hujusce methodi, facilis, simplicis, juxta naturæ votum habitæ, confirmata praxis, nulla ei favebat publica institutio.

Plaudamus ætati nostræ, plaudamus vigili studio, sapienti-que beneficio illustrissimi viri qui res urbanas tam feliciter prosequitur! Quo duce & auspice, surgit ædificium publicum in quo providetur humanitatis bono, simul & artis salutaris incremento.

Audiunt omnes mulieribus, sive prægnantibus, sive puerperis, syphilide inquinatis, novum apertum esse Hospitium in quo infortunati earum pueruli unâ cum lacte materno sugunt alimentum & medicamen, in quo nutrices prætio conductæ suppeditant succum nutritium simul & antivenereum recens

(1) *Vide Astruc, de morbis venereis, lib. IV, cap. v.*

*Mauriceau, Traité des maladies des Femmes grosses, chap. XI,*

*De la cure de la maladie vener. des petits enfans,*  
*tom. I, p. 518.*

*Levret, l'Art des Accouch. troisième édition, p. 267.*

*Fabre, tom. 2, p. 265.*

*M. Nils Rosen, Traité des maladies des Enfans, traduit par*

*M. le Febvre de Villebrune, D. M. p. 560.*



natis è Nosocomio dicto, *l'Hôpital des Enfants-Trouvés*, vel ex alio loco adventitiis (1).

In hoc tam felici hospitio necessarium apti cujuscunque medii suppellectile adduxit beneficentia; & jam incœpti successus ampliores jubent auspicari. Hic naturæ interrogandæ frequentior datur occasio, hic accuratarum scater fons genuinus observationum, undè salutare rivi in miserrimam sobolem decurrere amabunt. Congestis ità plurimis hâc eâdem de re observationibus, certior, faciliior & promptior luis venereæ congenitæ Diagnosi, Prognosi, necnon curationi aperienda est via. Utinam bonorum omnium votis annuat hæc nostra dissertatio quam proponendam hodiè suscipimus, & quæ momenta duo offert adimplenda!

1°. Quænam diagnostica morbi venerei in recens natis symptomata?

2°. Quænam præstantior curationis methodus?

Cum verò symptomata venerea externis præsertim partibus inhæreant, cuti scilicet, textui cellulari & glandulis, singulum quodque organum leviter Anatomix penicillo venit delineandum.

## E X A N A T O M I A.

OMNES corporis partes communibus involvuntur tegumentis quorum, juxta recentiores, duplex instituitur divisio, in cutem nempe, & membranam cellularem aut adiposam.

Cutis miro quidem, sed extricatissimo conflata artificio, vasculari, nerveo & membraneo implicatur intertextu cui corii

---

(1) Vide *Hospice des pauvres Enfants nouveaux nés, atteints du mal vénérien*, broch., in-4°, par M. Colompièr.



nomen assignârunt Anatomici. Non eadem ubiquè densitas, non eadem textura, modò crassior, modò rarior. Extensionis & coarctationis capax varias imò & oppositas subit vices, ut in obesitate, graviditate, hydrope & emphysemate, aliundè in macie & marasmo, &c.

Diversi generis quamplurima vasa offert cutis. È spectabili venarum & arteriarum connubio plexus oritur vasculosus, evidentior tamen in genis, ubi liliis miscentur rosæ. Exteriori cutis superficiei adhæret membrana tenuis, perlucida, innumeris perforata poris, & nullo sensu donata, quæ dicitur epidermis.

Structuram attentè perpendenti minutissimæ solo intuitu apparent lamellæ, squamosæ, densissimæ, attamen spongiosæ, undè non rarò spissior evadit epidermis; quod plurimi evidenter probant morbi cutanei, monstratque maceratio arte parata.

Diversa etiam cuticulæ crassities quæ durorum corporum attritu fit major in volis manuum plantisque pedum, & callosa quidem, lamellis stratum super stratum additis; undè enervatur tactus exquisitior.

Non solùm cutem investit epidermis, ex partibus internis in internas disseminata per magnos hiatus reflexa diffunditur.

Deprehenduntur insuper microscopii ope cuticulæ expansiones quæ cutis poros permeant usquè ad tubulos cryptarum vel glandularum cutanearum excretorios, à quibus tamen igne, cantharidibus, & gangrenâ eam recedere observamus. De promptâ regeneratione non autem de verâ origine (1) omnes consentiunt.

Quæquæ sit, cutem ab attritu & dolore defendit epider-

---

(1) Vide Morgagni, Advers. Anat. pag. 13.



mis, sicque juvat tactus sensum & moderatur. Cuticulâ abrasâ; conspicuæ occurrunt eminentiæ quædam mammoïdeæ, hic villosæ, illic piramidales, quæ penicillatæ & radiatim dispositæ, ab extremis nervorum propaginibus hinc & inde perreptantibus efformantur & in digitorum apice, mammarum papillis, linguâ, labiis & in balano numerosiores, evidentioresque admodum reperiuntur (1).

Ex iis nervorum furculis exsurgit substantia mollis, pulposa, cuticulæ sic & cuti firmiter adhærens, reticuli vel cribri instar ordinata, cui corporis reticularis aut mucosi nomen à Malpighio concessum fuit.

Si Ruyschii experimentis fides adhibenda, potissimum ab eo pendet color cutis (2).

Lætet illius principium, non verò usus; si quidem papillarum mollitiem & ad tactum aptitudinem tueri videatur. De glandulis miliaribus vel folliculis à Stenone & Malpighio, (3) de Sebaceis à Morgagnio evulgatis, (4) de poris tum arteriosis tum venosis inhalationi & exhalationi dicatis, ab Hyppocrate & galeno cognititis (5), luculentis verò experimentis & indefessâ Sanctorii & Kaau observatione illustratis; (6) de pilis, unguibus & aliis cuti annexis partibus dicere strictior verat dissertationis cancellus, quibus de omnibus, Anatomicorum scriptis consulendum.

---

(1) Winslow, *Expos. Anat. Traité des Tégum.*

(2) Ruyschii, *Advers. Anat.* Dec. III, pag. 26.

(3) *Epistol. de glandulis*, p. 5, edit. Londin.

(4) *Advers. Anatom.*

(5) Hyppocrat. *Epid. Lib. VI, Sect. VI.*

(6) *Medica Statica Sanctorii.*

Item, de Perspir. Hypp. Kaau.



Cuti subjacet & adhæret laxiùs hîc, illic firmiùs membrana cellularis aut adiposa. Eo dicitur nomine secundum corporis involucrum commune. Omnium organorum basis & fundamentum, alia aliis alligando, eorum consensum, variaque officia fovet & tuetur; idèdque meritò ad corporis humani elementa refertur tela cellulosa (1). Plurimis conflatur folliculis membranaceis ità inter se ordinatis, ut innumera efformentur cellulae in puerili ætate copiosiores, in senili verò rariores, variae expansionis mutuum commercium sortientes; quod perspicue constat Emphysemate, Leucophlegmariâ, necnon laniorum infusu.

In iis coacervatur interstitiis oleum tenue, blandum, in diversis locis spissitudine diversum, cujus secretioni arteriae capillares, & resorbtioni venulae inhiantes potissimum favent (2). Epulis, somno, quiete mirum in modum augetur adiposus humor, & congestus non rarò nocet (3). Inediâ, motu, vigiliâ, curis animi, febre, morbo quolibet facili & brevi evanescit. In omnibus corporis partibus non aequè diffunditur pinguedo; quae quidem varietas à vario illius usu pendet: sic musculos copiosè ambit ut facilior motus evadat, & minor attritio. Sic adiposae partes, delicatesiores præbent lineamentorum tractus, undè venustior forma; sic rursus sedent in fæminarum vultu, sic amabili globulorum formâ jucundiores sororiantur mammae.

Alii sunt textus cellularis usus, quos utpotè nostro proposito minùs necessarios, tacebimus.

Variae sunt de glandularum structurâ opiniones (4); genera-

(1) Vide Halleri Elem. Physiol. tom. 1, lib. 1, p. 19.

(2) Ruyschii, Advers. Anat. p. 28.

(3) Halleri, idem, p. 50.

(4) Vide Laurentii Heisteri, compend. Anatom. de Adenologiâ.



tim verò denominantur partes peculiaris habitus, figurâ, colore, connexione, structurâ & usu ab aliis discrepantes. Illa autem organa constituit minutissimorum diversi generis vasorum apparatus, quæ tortuoso flexu disponantur inter se, textu cellulari uniuntur, membranâ sibi propriâ involvuntur, plerumque etiam ductu excretorio donantur; unde eorum Parenchyma.

Ad id omnes glandulæ conferunt ut humorem quemdam, vasorum ope, secernant à sanguine.

Supervacanea foret de glandularum structurâ & usu prolixior expositio. Ex adumbrata descriptione, in pronò est explanare cur in morbo venereo qui humorem mucosum & sebaceum maximè afficit, toties laborent glandulæ, & veneni consortium adedò facile admittant (1); undè varii & innumeri eructantur affectus de quibus postmodò nobis erit dicendum. Sed antequam symptomata insitæ luis venereæ exhibeamus, quedam sunt præmittenda de illius differentiis, & de variis ejusdem communicandæ modis.

## EX CHIRURGIA

Circâ Syphilidis naturam, originem & essentialem causam fluctuat etiamnùm auctorum incerta mens: detegendo velo, frustra infudârunt celeberrimi Astruc & Fabre, nihilque eorum scriptis addere juber prudentia. Aget solummodò dissertatio nostra de morbo quatenus recens natos occupat; huic autem argumento præcedere debent indicatio temporum in quibus à conceptionis instanti, imò & ultrâ partum, à matre in fœtum derivari possit virus venereum, simul & illius communicandi

---

(1) Astruc, de morb. vener. tom. 1, p. 429.



varietas (1). Contagii propagatio in quatuor dividitur tempora, conceptionis scilicet, gestationis, partûs, & etiam lactationis.

1°. Ubi primùm in utero materno fecundatur infantis uimentum, vel alterutrum parentem, vel utrumque infestat lues, aut recens, aut jam à longo tempore sæviens; partem ipsam culpæ ream obsidet, totamvè sanguinis molem corrumpit; hinc & indè furit, vel injectâ antiveneorum catenâ cohibetur.

2°. È fonte puro dimanavit embryonis vita, & jam gravida mater venenum exhaustit; loco natali adhærens primariò virus, curationis idoneæ defectu, per integrum corpus serpit, & ad fœtum usquè cum succo alibili defertur.

3°. Accidit etiam ut gravida mater quæ, nullo se suspicatur pollutam veneno, luem tamen exitiali connubio mox parturienda contrahat, fœtusque eandem intrâ partûs angustias excipiat; sic vitales auras cum turpi morbo propinandas haurit inscius, & jam vitiato aëre fruitur.

4°. Pendet à mammis o rus dulce & virus, cum lacte fugit puerulus sive ab ipsa matre, sive à nutrice prætio conductâ, sæpiùs infidâ, quæ dùm porrigit ubera, porrigit simul innocuo & miserrimo infanti oscula venenosâ voluptate quasi fecundata.

Pro eâ multiplici modorum & temporum varietate quâ oritur venerea lues congenita, diverso viget intensitatis gradu; undè patet cur à parentibus Syphylide contaminatis nascantur infantuli illius pestis expertes, aut apud quos, per quoddam vitæ curriculum, quasi sopita jac et alii verò promptis

---

(1) Vide Observationes celeberrimi nostri *Petit*, luculentis illustratas Commentariis à celeberrimo *M. Fabre*, in libro jam laudato, tom. 1, pag. 6.



ejus furoribus devoveantur victimæ, aut larvatâ ipsius figurâ, rachitismo, scrophulis, varisque generis obstructionibus obnoxii vitam trahant infelicem.

Quoties in hac morborum, vel, ut rectius dicam, symptomatum farragine defunt vera luis criteria, quæ solo temporis lapsu, eheu serius dignoscuntur? Quoties fallaci symptomatum cohorte circumdatur idem ille morbus medicamentis nutriti simul & nutritio noxiis incassum oppugnandus? Quanti ergo prætiæ æstimanda Diagnôsis quam certam & inconcussam exhibebunt symptomata quadam luem veneream in recens natis frequentius comitantia? Itaque viam adhucdum leviter tritam adaperiat ipsamet experientia; jam inter innumeras & varias ejusdem morbi complicationes nobis Chirurgiam in Nosocomio dicto *Bicêtre*, exercentibus facem præviam obtulit (1), & tandem ex novo Hospitio emerget optata lux quâ tenebræ superstitres sint discutiendæ. Hic incipit filum illud ariadneum quo gressus incerti deduci possint extrâ labyrinthum jamdudum inexplicabilem (2).

---

(1) Experimenta nostra in Nosocomio dicto *Bicêtre* incepta, consilio & opere juit celeberrimus M. *Brun*, Nosocomii Generalis Chirurgus primarius, Doctor Medicus Remensis.

(2) Exorientis hujusce Hospitii curam gessimus, unâ cum MM. *Colombier* & *Doublet*, D. M. P. omnem conjunctis viribus operam navavimus, totisque armis enixi sumus ut observationes experientiâ communi illustratas sive in Diagnosi, sive in tutiori curatione sedulo colligeremus. Jam Medicorum eorundem indefessus labor, jam laudanda sagacitas, dignaque ministro humanitatis amico, cujus ope nobis arridet institutionis utilitas, publici fecerunt juris, & nostras in inquirendo morbo vigilias, & in curando successus.

Vide *Hospice des pauvres Enfants nouveaux nés, atteints du mal vénérien*, Paris, 1781, par M. *Colombier*.

Idem, *Mémoires de la Société Royale de Médecine*.

*Mémoire sur les symptômes & le traitement de la maladie vénérienne dans les enfans nouveaux nés*. Paris, 1781, par M. *Doublet*.



In omnes ferè corporis partes, sævit venerea lues, etiam hæreditaria, & experièntiâ judice, apud infantulos, oculis, naso, ori, partibusque generationi dicatis adhæret præcipuè. Hinc multiplex, turpissimumque istius satellitium efformant tumores, pustulæ & ulcera, quæ quidem ut certo disponantur ordine symptomata, cutem generatim, caput verò speciatim, truncum & artus obfidentia fideliter exponemus.

Plerumque lutea, fusca, livida, rugis, crustisque furfuraceis deturpata, videtur cutis, variis maculata modis, nunc apparet, nunc in ea plus minusvè impressa cernuntur inflammationis vestigia; mox horret erysipelatos eruptionibus, pustulisvè altioribus, siccioribus & sæpè crustâ induratis, mox diversa serpunt ulcera. Hic tumores duri & indolentes, illic molles, acervi, & lento quasi gradu ad suppurationem vergentes deprehenduntur.

Vultum turpè deformant pustulæ siccæ inflammatoriæ, purulentiæ, nonnunquam impetiginosæ. Jam fugiunt faciei decus & splendor, eraduntur genuina sanitatis, lætitiæ, & innocentia lineamenta, jam fatalem typum insculpsit senectus, maximè precox. Risuum, jocorumque naturalem locum usurpant macies, livor & rugæ, sicque tristis delineatur vultus, in puerulis contagio venereo non inquinatis rarò occurrendus. Quod quidem symptoma mox expressum, quasi pathognomonicum, teste nostrâ praxi, affirmare licet: ideòque sic deformes recens nati sanæ nutritici non sunt committendi, nisi decem vel duodecim diebus elapsis, ubi tunc plerumque sincerus morbi character explicandus.

Sui sunt corio affectus quibus indieatur Syphilidis præsentia, erosiones scilicet initio simplices, quæ in coronali, parietali & occipitali frequentius occurrunt, latè serpunt, & albescunt paulatim, mox exudat humor ichorosus & foetidus, mox nigricans



fit color, minitantis gangrenæ omen. Apparent etiam pustulæ variolas admodum referentes, vel ad lentam suppurationem paratæ, vel absque eadem exsiccatae.

Obsidetur insuper corium capillatum variis tumoribus quorum alii duri, rotundi, inæquales, alii molles cutis colorem non maculant, lymphaticorumque naturam æmulantur. Quidam inflammatorii in abcessum citius abeunt, & quandòque cariem ossium minantur.

Infestat rarò aurium ductus venerea lues, non nunquam tamen insurgunt eruptiones herpeticæ, necnon excoriationes pure ichoroso madidæ. Oculus suis quoque cruciatur morbis, undè palpebrarum œdema, præsertim superioris, Ophtalmia sicca, humida, purulenta, Epiphora, Erosiones & ulcera corneæ, albugo, abcessus interiores, ipsiusmet oculi liquamen, membranarum apertura, humorum fluxus, necnon Staphiloma. Tumescit pituitaria membrana, in sinuum ambitu oriuntur ulcera saniosa & mucus narium exsiccatur, undè earum obstructio; difficilis respiratio, puerorum deniquè sat frequens suffocatio. Hæc autem omnia mala iis potissimum incumbunt qui nullâ laborârunt Ophtalmiâ, tunc in olfactus organa ruit violentior pestis.

Os ipsum offenditur, sic pustulæ, apthæ, ulcera cancrofa quibus commissura labiorum, gengivæ & lingua premuntur. Inflammatio brevi accendit velum palati pendulum, amygdalas, uvulam & totum os omnino subvertit.

Varia inter symptomata quæ trunco imminet, annumerandæ veniunt eruptiones erysipelatosæ, herpeticæ, pustulæ complanatae, mox rubræ, vel lividæ, mox siccae & crustaceæ. Tumores & ulcera occupant axillas, scapulas, pectus, abdomen, umbilicum, inguina & clunes. Sæpè etiam ad spinam dorsi & os sacrum decurrunt tumores plus minusvè elati, molles, fusci aut nigri.



quandòque spinæ bifidæ speciem referentes; atinî tegumentis tantummodò commorantur.

Apud utriusque sexûs infantulos sæpissimè patefiunt rhagades fici, mariscæ, cristæ, condylomata & bullæ cristallinæ. Apud masculos ferotum, penis & balantis inflammatione corripiuntur, œdemate, pustulis, ulceribus & fissuris cancræosis urgentur, sed liquorem virulentum per urethram defluentem nondùm detexit observatio. Puerulæ contrà nonnunquam obnoxie sunt materiæ luteæ, necnon vitiatæ fluxui, quæ à mucoso quâsdam à vitæ initio fœminas afficiente discrepat. Vulvæ quoquè eorundem malorum sedes quæ in adultâ ætatè luem veneream indicant.

Suis peculiaribus morbis subjiciuntur & manus & pedes; ungues crassi, scabri fiunt, & abortis ad radices reduciis, Paronychiâ vulgò Panaritio, inflammatione, abscessu spontè decidunt. Altitiora etiam talum dilacerant ulcera.

Fastidiosa hæc tabula fideliter delineata eandem offert malorum congeriem quæ adultam ætatem cumulat & excruciat. Illud autem notandum quod apud infantes virus glandulis & ossibus rariùs inhæreat, frequentius verò cuti & textui celluloso.

Frequentiora inter ulcera quæ in caput, scapulas, axillas, inguina, sacrum, clunes, talum denique impetunt, aliâ pendere videntur à compressione quâ laboravit intra partûs angustias misellus infans, aliâ ab inflammatione leviori cui ansam præbent vincitura funiculî umbilicalis, linteorum attritus, fordities, lotii vel fecum acrimonia, cutis sinus versùs axillas & inguina, contusus deniquè corporis incubitus.

Ex ea tam multiplici symptomatum caterva, quædam certo insiguntur typo, certamque morbi venerèi præsentiam apud recens natos declarant; sed virulentî omnes non eadem afferunt: hi dubia duntaxat, alii vera post aliquot dies solummodò exhi-



bent; in quibusdam latet virus, vel seriùs suo erumpendum caractere, vel aliorum morborum lavâ obtégendum.

Quàm verò miseræ humanarum scientiarum vices & conditio ! Vix nostra crebrior experientia suspicatur tempus quo propriis symptomatibus haud dubiè appareat apud infantes venerea pestis; constat tamen eam versùs duo & decimum diem ab ortu sæpiùs expergesci, & varia mala ad illud, rarò ad remotius tempus insurgere.

Maneat ergò in arte nostra inconcussum longo duntaxat experientiæ & ratiocinii usu dubia à certis distinguenda esse venereæ luis hæreditariæ symptomata; tutamque è collecto observationum tenore deducendam esse prognosim.

Quid metuendum, quid sperandum, habitâ rerum ratione, tutiùs indicabit ulterior praxis; ex alienis verò (1); nostrisque hùc usquè collectis observationibus sequentia deducenda sunt corollaria.

Maximum sæpiùs portendunt periculum capitis ulcera; vel enim citiorem in gangrænâ delabuntur; vel lethalis sopor ea subsequitur; humoris in cerebrum metastatico defluxu.

Tenuës coriæ capillatæ pustulæ plerumquæ benignæ, tumores duri & rotundi in variis capitis partibus vagantes; ociùs, molles contrà qui suprâ fontanellâ insident; seriùs, suppurationis terminum adipiscuntur: ex iis autem dimanat modò humor albidus, & viscosus, modò serum puriforme, & tunc depressi paulatim evanescent.

---

(1) Vide Astruc, de morbis venereis, lib. iv, cap. v,

Levret, Art des Accouchemens.

M. Nils-Rosen, Traité des Maladies des Enfans, traduit par M. le Febyre de Villebrune, D. M. p. 556.

Doublet, Mémoire sur les symptomes & le traitement de la Maladie Vénérienne dans les enfans nouveaux-nés.



Fatalis & præfaga mortis imago in recens natis senilis vultus, ejusque decrepitude, non tamen certò lethale signum, si modò symptomatum comitantium minor urgeat impetus.

Cum purulentæ fluunt nares, muci saniosi aut inspissati præsentia oppilantur & irritantur, difficilisque anhelat respiratio, tunc mors ostia pulsat. In hoc casu nasi sinus tumefactâ Schneideri membranâ penitus occlusos, ulcuscula sparsim disseminata, cerebri & pulmonum infarctus explorat cadaverum anatomica sectio.

Oculorum verò morbi non tam gravi periculo laborant, & artisperitæ curis faciliè cedunt; funestè tamen accidit aliquoties globi ipsius suppuratio, sicque cerebro imminet periculum.

Quibus os occupatur, maximi momenti sunt morbi, quorum propagatione œsophagum vivida nonnunquam corripit inflammatio; undè irrita lactis succio. Cæterarum verò hujusce organi affectionum, non eadem viget gravitas. Labiorum, gingivarum cancri vix emergentes, & paulò numerosiores, coloris rosei, lutei, albescentes nihil triste ominantur. Non idem dicendum de eis qui confertim linguæ apicem & palatum invadunt, alius infiguntur, & fuscâ crustâ obteguntur. Minimè formidandæ sunt aphthæ latæ, parùm vividæ, oris interioris superficiei tantùm adhærentes (1); sed mors est in propinquo, si iis immiscetur miliaris infantulorum morbus qui, à Syphilide etsi alienus, cum ea lethaliter sæpiùs implicatur (2).

---

(1) Vide de cognoscendis & curandis morbis ab Herm. Boerhaave. Aphor. 985, &c. Celeberrimumque illius Commentat. Swieten.

(2) Morbus ille Scorbuticæ indoli sat affinis, ab ætris corruptela ortus, sicque in numerosis Nosocomiis frequentissimus, os interius, continuumque digestivarum viarum systema infestat, & sub specie punctulorum albescentium ab initio sese prodit, undè variæ denominationes gallicè *Millet*, *Muguet*, *Blanchet*. De illâ affectione quam atrocem vocat Celeb. *Levret*, silent plerique scriptores. Sed in luculentis regiæ Chirurgiæ Academiæ Actis egregiè describitur. Vide *Maladies de l'intérieur de la Bouche*, vol. V.



Cutis pustulæ tenues, & rarò disseminatæ, ad suppurationem citò vergentes, benignæ sunt indolis; malignæ verò, latæ, duræ & crustacæ. Ejusdem tumores, abscessus & ulcera plerumquè facilè curantur.

Periculum abest à tumoribus spinæ dorsalis, & ossis sacri non purulentis, purulentos autem graviter subsequuntur caries & gangræna.

Rubores, rhagades, varii generis excrescentias tum in ano, tum in genitalibus utriusque sexûs organis, dum ulceratio advenit, difficilè vincit remèdiorum energia.

Nihil metuendum à fluxu virulento quo afficiuntur puellulæ necnon à labrorum pudendi œdemate.

Pedes & tibiæ obfidetur erysipelatibus, & œdematosi infiltrationibus gravissimis, sæpèque lethaliibus, cum in hæc partes metastaticè irruit humor ophthalmicus.

Metum injiciunt psoricæ eruptiones, pustulæ crustacæ, & ulcuscula quæ in extremis digitorum frequentiora, ungues erodunt ad radices.

Facillimè curantur talorum ulcera.

Iteratâ observatione constat infantulos quibus laxa cutis, & diffluens pinguedo, ad quartum circiter mensem succumbere œdematosos, & apertis cadaveribus infarcta capitis, pectoris & abdominis viscera, infiltrationès necnon seri effluxus deprehenduntur.

Hæc sunt symptomata venerea apud recens natos obvia, magis, minùsve noxia. Alia autem ab implicato morbo pendunt, venereoque graviùs important periculum; sic dentitio, convulsivi motus, rubeola, variolæ, & præsertim morbus miliaris qui, si modò vividior irruat, plerumquè lethalis; tunc enim defraudatur infans ruco alibili ad vitam degendam necessario, mediisque lui venereæ debellandæ idoneis.



Jam virus syphiliticum sub multiplici respectu consideratum habemus, jam varii illius à matre in fœtum propagandi modi in lucem exponuntur, jam diversæ, ut ita dicam, formæ, & innumere complicationes indicantur: quid ergò superest, nisi ut plana fiat curationis via quam monstravit ratiocinium, & tutiorem reddet experientia?

Circà methodum quâ curandi sunt infantes unâ cum miasmate venereo congeniti, duo adimplenda veniunt curationis momenta.

1<sup>o</sup>. Nutricum lac hydrargiri partibus imbutum exhauriant recens nati.

2<sup>o</sup>. Sustineantur congruâ vivendi ratione ætati & morbo maximè accommodatâ.

Methodus pro nutricibus adhibenda circà quadruplicem versatur cardinem, 1<sup>o</sup>. exitiosæ partus sequelæ præcaveantur & fiantur, 2<sup>o</sup>. antivenerea tempore opportuno administrantur, 3<sup>o</sup>. propugnentur & debellantur peculiaria quædam symptomata, 4<sup>o</sup>. tandem præscribatur victus ratio curationi idonea.

Missâ facimus ea mala quæ sæpius partum sequuntur, febrim lacteam, uterinam hæmorrhagiam, lochiorum suppressionem aut imminutionem, quæ tamen rarò nutricibus accidunt; his nihilominus infelicitè obviis, ad solita remedia confugiendum.

Est autem morbus puerperis & nutricibus sæpe frequens, vulgarior tamen iis quas afficit venerea labes, maximi quidem periculi, cum lactis suctum impediat, scilicet mammarum ingurgitatio ab aëris frigidioris contactu, à duri cujusdam corporis attritu, ab imprudenti vivendi normâ, necnon, ut evenit frequentius, à scissuris & rhagadibus areolæ, & ipsius papillæ ulcerationibus oriunda; tunc acerbissimi dolores sanguinem, cæterosque humores in mammam derivant irritatam. Quoties prominent abscessus secretionem & excretionem lactis sistentes?



Quoties metastatico impetu in varia organa varii morbi, & ipsa mors, nimium præceps, ingruunt?

Areolæ & papillæ scissuris levamen affert, teste nostrâ praxi, medulla in longis ovium ossibus reperiunda, balneo mariæ liquata.

In mammarum infarctu prosperè succedunt cataplasmata emollientia, maturantia, unguenta digestiva, suppuratoria, necnon haustus vi diaphoreticâ & leniter purgante donati.

Quàm periculosa sit lactis metastasis frequentior & tristior docet nos experientia, præsertim cum in viscera vitæ necessaria irrumpit. In re tam promptè gravissimâ ponenda spes in venæ sectionibus, vesicatoriis, balneis, necnon diaphoreticis & leniter aperientibus decoctis.

Si verò organa minoris momenti impetum sustinent, tunc non ità urget periculum, & in promptu sunt medicamenta. Naturæ autem viribus consulendum quæ materiam lacteam vel ad cutem sub specie febris miliaris propeller, vel ad renes, undè copiosa simul & critica lorii copia.

Varias inter Mercurii præparationes quas instituit Empeiria, hydrargirosæ inunctiones nobis videntur anteponendæ. Prima adhibenda frictio ad unguenti Neapolitani semidragmam, quæ dosis, ad dragmam unam & semissem paulatim & gradatim adaugetur, ultrà quàm progredi vetat prudentia; si enim numerosiores, viciniore, nimia copiâ, nullisque balneis interpositis administrentur illitus, tunc pueruli delicatiores intimis torquentur doloribus; mox fluxus alvi hientericus, viridescens miseris fatigat, & post duodecim horas ab unctione, anxietatibus plerique premuntur infantuli.

Inter unamquamque frictionem, trium dierum ponitur intervallum, & etiam longius dummodò sive nutriti; sive recedens nato quid insoliti eveniat. Quæ quidem unctionum methodus

prudenter instituta nutricum os servat intactum, plurimasque ad extremum sanationis curriculum deducit à quocumque malo immunes.

Quæ, duobus infantulis ubera porrexerunt, hydrargiri effectus minùs fuerunt expertæ quàm unius pueruli nutrices; undè constat specifici partem maximam in nutritos è lactis fontibus derivari, majoremque dosim pro nutricibus esse adhibendam (1). Varia igitur remedii dosis, varium quoquè administrandi tempus (2), pro temperamentis, mali gravitate, variorum symptomatum naturâ, necnon puerulorum debilitate.

Nutrices in flore juventutis benè constitutæ, quibus cutis subfusca & firmior, feliciùs & ociùs curationis terminum assequuntur. Torpet autem iners remedium per quindecim circiter diès apud eas quæ jamdudùm syphilide laborant, & apud quas illius symptomata hætenùs nullo modo fuerunt mitigata.

Unctionibus methodicè adhibitis pleraque facillimè cedunt symptomata, alia citiùs, v. g. verrucæ, ulcuscula cancrofa, &c. Alia seriùs, v. g. vaginæ ulcera, variæ ad anum excrecentiæ gonorrhea virulenta; quæ omnia, peculiaria sibi vindicant medicamenta: valent idèò fots emollientes, lotiones deterfivæ, cataplasmata, unguenta & emplastra tum resolutiva, tum maturantia, plerumque verò topica hydrargiro imbuta. Conferunt maximè locales illitus, unà cum suffumigationibus cinnabarinis, aut rectiùs cum mercurio crudo parandis, præsertim si rebelles accidunt fungositates & excrecentiæ quæ causticis & quacumque operatione acerbâ non sunt debellandæ; dolor enim lactis rivos, ut ita dicam, claudit (3).

(1) Ad curationem plerumque requiruntur unguenti Neapolitani  $\text{Zv}$ .

(2) Ultrà tres menses sæpiùs non retardatur nutricum sanatio.

(3) Fungosâ vaginæ excrecentiâ cruciabatur juvenis, uberiori lacte fer-



Nutricum simul & puerulorum curationi potissimum confert idonea vivendi ratio; ea sit quæ alimentum juxta modum supeditet, alvum liberè & facilè subducatur, saponaceo vehiculo, Specifici vires adjuvet, humorumque acrimoniam dulcioribus succis involvat & temperet. Suademus itaque lac, ova, juscula, plantas oleraceas, fructus benè coctos aut maturos, panem optimâ fermentatione concoctum, & etiam carnes juvenilium animalium tenerimas. Meri porus non omnino ablegandus, vires & tonum conciliat ventriculo, tristitiam fugat, & quodcumque viscus languidum exsuscitat.

Tutiorè & citiorè vim exerit remedium, si pleno haustu potat ægra nutrix ptisanam hordeaceam, orizaceam, gramineam glycyrrhisâ pauxillum edulcoratam, vel cum florum pectoralium infusionibus præparatam.

Ex institutâ nutricum curatione pendet sanatio infantulorum lue venereâ inquinatorum, at nihilominus vis hydrargiri, tenerimæ ætati frequentium morborum natura, necnon victus accomodatus, peculiaris quædam expostulant.

Experientiâ freti spontè asserimus nocivè minùs agere specificum in recens natos qui priùs in sinu materno præparationes antisiphiliticas quasi delibârunt; hydrargirosæ verò virtutis nondum conscios expectant colici dolores, absque ullis evacuationibus, calor acris & urens, jactationes, convulsivi insultus; nihil appetunt, sedent in ore pallor & macies; quibus tamen incommòdis varias addunt mutationes varia atmospheræ conditio, varia nutricum indoles, & diversa agendi ratio.

Suspensio mercuriali illitu, emollientibus & anodynis largo

---

cundans nutrix, operatione gravi & acerbâ à nobis institutâ, mamma ad dimidium volumen crastinâ die detumuerunt, & ad priorem formam aut libertatem pristinam per reliquum nutritionis tempus non potuerunt explicari.

haustu potis hæc mala sæpissimè fugantur. Convulsivos motus proximâ morte minantes, mirum in modum, compescuit enematum camphoratorum usus.

Attento igitur oculo Mercurii effectus in nutrices & infantulos sequatur prudens Chirurgus; eundem non fugiat, pro singulo curationis tempore, diversus in puerulorum symptomata remedii agendi modus; variat enim citior aut tardior illius energia pro symptomatum naturâ, intensitate, diversâ tamen nutricis tum nutriti sensibilitate, necnon irritabilitate.

Mense elapso ab hydrargyrosi lactis usu, siccantur pustulæ, aut in suppurationem abeunt, deferrent inflammationes cutaneæ, discutiuntur œdemata, & mundificantur cancri; jam non serpunt ulcera, exceptis tamen iis quæ caput, umbilicum, & renes occupant. Tunc nova fulget facies, evanescunt rugæ, faciliior fit deglutitio, os roseo colore subridet, resolutione, suppuratione & quasi transfudatione desinunt tumores.

In oculorum morbos promptiores effectus exerit medendi methodus; at felix medicamentorum cursus, ut ita dicam, retardatur nonnunquam aphthis gangrænosæ quæ tunc repululant, & inhibetur miliari morbo qui, etsi venereæ luis nullo modo particeps, ingravescit contagiosè, eoque funestior sævit quod, omnino prohibita lactatione, alimento & medicamine miser defraudetur infantulus. Ineunte secundo mense, nova sæpius exsurgit symptomatum turba; variis innascuntur partibus lymphatici & steatomatosi tumores, qui quidem molliter fontanellæ insident, renitenter autem juxta scapulas, spinam dorsalem, & os sacrum insiguntur. Tunc excoriantur & ulcerantur tala, horrent pustulis & pedes & manus, fluxusque quasi gonorrhæus ex organis puerularum genitalibus non rarò derivatur.

Varia inter hæc symptomata, difficilior & tardior tumorum



caput, scapulas & extrema præsertim obfidentium sanatio: si moras patitur suppuratio, maturantibus emplastris adjuvetur; si pus maturum in aliquo coacervatur loco, lanceolâ instituat incisio, & reliquum curationis opus naturæ committatur.

Nullo autem oppugnandi sunt instrumento tumores juxta spinam dorsi & os sacrum insidentes, eorumque suppuratio cautè arcenda, aliter enim vertebrae sæpius depascitur caries.

Intrâ quadraginta vel quinquaginta dies silet symptomatum venereorum impetus; fuerunt plurima, & quæ supersunt, in meliorem statum vergunt. Anomalis tamen febribus & diarrhæis ad id tempus subjacent obnoxii infantes; hæc autem mala à primarum viarum infarctu oriunda sanant radix brasiliensis & minorativa: una cum temporis lapsu plerumque decedit morbus, ita ut vires paulatim accedant. Niter in ore color roseus, & valens corporis habitus sanitatem prænuntiat; sic inter sex menses sanatur hæreditaria venerea lues, aut saltem maximè mitigatur.

Infantulos autem alia manent interdum incommoda. Debilissimos & cacochimiâ quasi prostratos fatigat valetudo in longum producta, morbisque lui venereæ prorsus alienis retardata; ita leucophlegmatia, abdominis ingurgitatio, acida cachexia, & diarrhæa quam sæpè excipit dysenteria, quibus feliciter admodum succedunt ipecacuanha, leniter purgantia, pulvis cancrorum, aqua orizæ aromate condita, cardiaca leni virtute pollentia, & vinum cum absynthio paratum.

Sic morboſi infantes ultra octavum mensem ubi primum erumpit dentitio, mortem raro effugiunt.

Pro variis ætatis, necessitatum, morbi & curationis circumstantiis, necnon pro vario nutricum statu, varia instituenda est vitæ ratio.

Per

Per sex menses sufficit tantummodò nutricis opiparæ lac, cujus inopia ad caprinum cogit. Lactis etiam vices felici successu gerunt aqua orizæ simplex, hordeacea melle edulcorata, & etiam pauxillo vini corroborata.

Notandum verò quod duos infantulos, nutrire non valeant puerperæ: lac enim succo alibili parum turgens, duplici nutritioni fit prorsus inhabile; sicque, suadente experientia, aboletur usus exiguo nutricum, & ingenti puerulorum numero primum in novo hospitio usurpatus; & bono animo fatemur lacti pauperrimo ascribenda esse mala quæ convalescentes expectant pueros, & debilitatem, cacochimiam, aliasque hujusce generis misérias morte tandem terminatas important.

Ad quinque vel sex menses præscribuntur cremores hordeacei cum lacte parati, panatæ, & juscula ex carne animalium deprompta, bis in diem assumenda (1).

Sed infelicitè contigit ut plurimi, variorum morborum ratione, suctionis impotentia, ipsomet nutricum defectu, lactatûs beneficio frui nequeant; tunc ad media jam exarata confugiendum. At eheu! intra primi aut alterius mensis spatium miserrimè pereunt, sive venereæ luis affectibus, sive miliari morbo & sæpiùs marasmo confecti, quibus ea depromuntur adulterina alimenta. In hoc tam gravi rerum articulo nostra mens erat moleculas hydrargirolas in nutricum cubiculis disseminatas suctionis impotentibus maximi fore emolumentum ad arcendam symptomatum gravitatem ideòque expectandam lactationis facultatem; vota autem & experimenta delusit eventus.

---

(1) Lege luculentam Consultationem à saluberrimâ Facultate Parisiensi promulgatam circa recens natos in Nosocomio Generali Aquisextano alendos.



Feliciorem verò promittunt exitum suffitus quos mercurio crudo in ignem projecto obtinemus (1).

Ex observatis ideò certa & tristis deducenda venit conclusio artem vel diætericè, vel therapeuticè huc usque esse mancā erga infantulos qui, miliari morbo, aut venereis symptomatibus in os detonantibus laborantes, suctione & deglutitione orbantur. Quid ergò impedit quominus novam nutritionis curationisque viam artis periti interrogare audeant? Nonnè nutritioni inservire possent tū enemata jusculina, tū lac ope fistulæ ad stomachum usque delatum? Nonnè curationi prodesse antivenerea lacticia quæ suavit celeberrimus *Levret* (2)? Quā de novā methodo silendum, usque dūm tutius instituta experimenta quid sit sperandum indicaverint (3).

(1) Sic quinque infantulos aphthis gangrænosæ versùs os interius occupatos sat prosperè curavimus. In omnibus saltem plurima fatalis illius morbi mitigata fuere symptomata, quæ omnino in tribus evanuerunt. Veratamen prudentia ut tali auxilio nimio opere credamus, eos enim omnes rapuit infida mors in posterum nutritionis defectu, diarrhæa & marasmo accessita.

(2) *L'Art des Accouchemens, troisième édition, p. 266.*

*Idem, vide Nils-Rosen.*

(3) Illius celeberrimi *Levret*, vestigiis insistens hujusce actûs *Præses*, variis præparationibus hydrargirosis captivum lac antisyphiliticâ virtute donavit; & ex quibusdam experimentis eo cū institutis, etsi nihil certi valeat hætenus affirmari, fulget tamen spes plurima in posterum ex eadem methodo sagaciter calcata & ad perfectionis apicem deducta, in genus humanum derivanda esse commoda. Lactatione enim quocumque modo impedita, aut deficientibus nutricibus, vicarium illud in promptu erit auxilium; valebit quoque & sæpissimè pro adultis venereâ phthysi, nimia virium deperditione, provectionisve ætatis imbecillitate, immediatæ mercurialium administrationi impatiens; sicque dictâ lacteâ antivenereâ nutriendis & sanandis.



Expressam nunc habemus tabulam in qua varia luis venereæ apud recens natos symptomata & incrementa carbone notantur, in quâ variæ ejusdem complicationes cum morbis puerilibus miasmate syphilitico minimè deturpatis, & præsertim eo cum terribissimo quem miliarem vocant, exponuntur, in qua tandem depinguntur peculiaria mala quibus os afficitur, unde irrita lactatio & deglutitio. Quibus omnibus in antecessum delineatis vix quosdam unâ cum syphilide congenitos fatum ultimum fugere judicandum.

Si tamen attentè perpendamus innumeras calamitates quæ infantulorum incunabula, & præsertim in nosocomiis obsident, si nostris oculis continuò sit obvia mors quæ recens natos omnes lue venereâ contaminatos cito subsequitur pede, si denique non rari successus in novo hospitio enati, & per diem invalescentes animo obversentur (1) & omnia hæc æquâ lance ponderentur, victrix erit, ni fallimur, ea curandi methodus fusiùs forsan exposita quam ratiocinium & experientia temporis lapsu adjuvabunt.

---

(1) Si calculo promiscuè subjiciantur in ipsomet hospitio recens nati, vel ad illud deVecti, sive nutricum lacte fuerint enutriti, sive defraudati, apud quos vario circumstantiarum tenore nulla lactatio, nulla proinde vera curatio; aut quos diversis morbis lue venereæ nullo modo congeneribus tentatos rapuit nefanda mors; evasit sana quarta ægrotantium pars. Vide *Mémoire sur les symptômes & le traitement de la maladie vénérienne dans les enfans nouveaux nés*, pag. 75.



*HAS THESES, Deo juvante & Præside M. PETRO FAGUER,  
 Artium Liberalium & Chirurgiæ Magistro, Regiæ Academiæ  
 Chirurgiæ Consiliario, Scientiarum, Humaniarum Litterarum  
 & Artium Academiæ Catalaunensis Socio, Regiarum excu-  
 biarum Legionis Equestris DE VILLEROY Chirurgo Majori,  
 Saluberrimæ Facultatis Remensis Doctore, tueri conabitur  
 RENATUS ALEXANDER FAGUER DESPERRIERES  
 Cenomanus, Artium Liberalium Facultatis Parisiensis &  
 Chirurgiæ Cenomanensis Magister, nuper Nosocomii Generalis  
 Parisiensis in domo dictâ Bicêtre, nunc in Hospitio publico de  
 Vaugirard, Chirurgus præcipuus, Theseos Auctor.  
 Die Lunæ 29 Mensis Julii 1782, à sesqui-secundâ post meridiem  
 ad septimam.*

IN REGIIS CHIRURGORUM SCHOLIS,

PRO ACTU PUBLICO

ET

SOLEMNI COOPTATIONE



PARISIIS,

Typis MICHAELIS LAMBERT, Regii Chirurgiæ  
 Collegii necnon Academiæ Typographi, viâ Cithareâ.

M. DCC. LXXXII.